

## *Elogio pa Women's Club of Aruba*

# Pa nan rol importante pa cu conscientisacion di HIV/AIDS

Candlelight Memorial ta un tradicion cu mester sigui mantene. Den e di dos mita di añanan 1980 Women's Club of Aruba a pone na nos isla e spotlight riba un enfermedad cu tabata relativamente nobo pa mundo. Hunto cu algun profesional medico y diferente instancia nan a cuminsa cu e tarea dificil di introduci informacion y conscientisacion tocante un malesa cu tabata "taboe" pa papia di dje den nos comunidad, y en realidad den mundo henter. Women's Club of Aruba a curasha diagnostica y campananan di prevencion di e virus HIV cu tabata desaroya den mayoria caso den e enfermedad AIDS den e tempo ey. E impacto tabata sumamente grandi riba e pashent su famia y na trabou.

Minister dr. Alex Schwengle no por tabata presente na e tradicional conmemoracion anual conoci como AIDS Candlelight Memorial". Sinembargo e mandatario a haya esaki di suma importancia pa subraya e lugan importante cu Women's Club of Aruba, nan partnernan y nan campananan di conscientisacion tin den nos comunidad.

"Mi tin hopi respet y admiracion pa gruponan den nos comunidad manera Women's Club of Aruba. Nan a



tuma un topico taboe, un preocupacion grandi, un enfermedad contagioso cu un introduccion rondona pa controversia y miedo y nan a wak e importancia di prevencion. Pa asina nan contribui na e comunidad cu nan ta parti di dje y tanto nan ta stima pa e wordo protegi mas tanto posibel di su introduccion y expansion," Minister Schwengle a expresa.

AIDS Candlelight Memorial ta un evento anual cu ta tuma lugan riba e di tres diadomingo di luna di mei. Mundialmente mas di 1200 organizacion comunitario den 115 pais ta organisa e evento aki, unda cu ta cende cuater bela cu un simbolismo special: e bela preto pa conmemora personanan cu a fayece a consecuencia di HIV/AIDS; e bela blanco como muestra di

apoyo na e famianan; e bela berde pa speranza; y e bela cora como muestra di sosten pa e personanan bibando cu HIV/AIDS.

E aña aki, e conmemoracion a haya e tema internacional "Supporting the future", esta "Apoyando futuro".

Women's Club of Aruba (WCA) a expresa satisfaccion cu Ministerio di Salubridad ta haciendo un contribucion ainda mas activo den e area di prevencion, pero specialmente den e rol activo di hacimento di test pa medio di Bus di Salud. Chairman di e AIDS Awareness and Education Committee, sra Mary-Lou de Windt a splica cu awendia Bus di Salud conoce un HIV team cu ta ofrece un "rapid HIV test" hunto cu e testnan cu ta wordo ofreci pa e personal medico y e ta atendido pa tende cu 8 di cada 10 persona ta bay di acuerdo pa haci e test.

WCA ta sinti cu e taboe ta kibrando hopi y e trabao cu nan ta bin haciendo for di aña 1986 ta dunando su frutanan, tanto den e area di uzo di proteccion pa miho prevencion, pero sigur pa cu diagnostica tempran. Prevencion ta e palabra clave den e caso aki y ta p'esey Minister Schwengle tin su preocupacion pa loke ta



trata e cifranan di personanan infecta cu e virus HIV cu a aumenta den ultimo tempo.

Sra. Martis Presidente di WCA a splica tambe cu awendia mas tempran un persona haya sa cu e ta HIV positivo, mas chens e ta duna su mes di biba y haya e tratamento adecua. E pashent cu ta HIV positivo no tin nodo di muri di AIDS, tin remedi cu ta yuda e persona hiba un bida cu calidad aunke cu e ta infecta cu e virus, mescos cu cualkier otro persona cu tin un malesa cronico. Pero ta e pashent di HIV su responsabilidad pa cumpli debidamente cu su tratamento.

Martis ta curasha tur hende pa busca e informacion correcto y principalmente pa uza proteccion y asina preveni pa

wordo contagia; e persona cu ta sospecha cu e por ta HIV positivo, Martis ta curasha e persona pa haci su test y asina detecta e virus tempran pa haya tratamento tempran y evita e desaroyo di AIDS.

E aña aki AIDS Candlelight Memorial a tuma lugan na Paseo Herencia, unda cu a conta cu presencia di Gobernador Fredis Refunjol y cooperacion di parti di, entre otro Scol di Musica Rufo Wever, Addonsito Croes, John Freddy Montoya, Father Sidney Jacob y Elisabeth Pope pa un programa bunita cu un balor aña den e campaña di conscientisacion y como un gesto importante pa "support the future".